



Communicaziun a las medias

Data: 11 da zercladur 2022

Inscunter naziunal da las presidentas da vischnancas e da citads

Il 11 da zercladur ha la cussegliera federala Simonetta Sommaruga envidà las presidentas da vischnancas e da citads da la Svizra ad in inscunter a Berna. L'inscunter è stà ina premiera. Var 160 presidentas èn suandadas l'invitaziun ed han barattà savida ed experientschas en discurs sco er creà raits da contact interregionalas.

En ils presidis da vischnancas e da citads vegni prestà lavur preziosa a favur da la populaziun. Sch'ina roda va en l'autra, alura èn las finanzas equilibradas, las infrastructuras pon vegnir adattadas e mantegnidas conform als basegns ed i pon vegnir stgaffidas plazzas da lavur. Ultra da talas sfidas a lunga vista han las presidentas da vischnancas e da citads er da dumagnar problems urgents a curta vista. Pervia da la Guerra en l'Ucraina ston ellas actualmain per exempel chattar svelt alloschis per fugitivas e fugitivs, pussibilitar als uffants ucranais d'ir a scola ubain er prestar agid social.

Las grondas sfidas a la testa da las citads e da las vischnancas èn stadas en il center dals discurs da las var 160 presidentas ch'èn stadas preschentadas a l'inscunter a Berna. Pli baud è la cussegliera federala Simonetta Sommaruga sezza stada commembra d'ina executiva sin plaun communal. Ord questa experientscha ha ella undrà la lavur da las dunnas: «Tge che prosperescha bain en las citads ed en las vischnancas, ha in effect per l'entir pajais. Las vischnancas èn numnadain la basa da la Svizra. Tant pli impurtant èsi ch'er dunnas sa participeschan là activamain a la concepziun.»

En Svizra datti stgars 2150 vischnancas. Tenor in'enquista da la corporaziun da vischnancas da l'onn 2020 han var 350 vischnancas ina dunna a la testa. Quai correspunda circa a 16 pertschient. Quests 16 pertschient èn relevants e surpiglian ina rolla d'ideal impurtanta. Questas presidentas èn in exempel, co che las dunnas pon sa participar a la concepziun e l'influenzar cun success. En il Cussegl naziunal sco er en il Cussegl federal è la quota da dunnas cleramain pli auta.

«Correspondentamain datti en las vischnancas bler potenzial feminin che na vegn betg duvrà. Potenzial che nus duessan trair a niz per il pajais, per noss avegnir e per l'entira populaziun.»

Dumondas: Géraldine Eicher, Communicaziun SG DATEC, +41 58 466 80 00,
geraldine.eicher@gs-uvek.admin.ch